

# 說菩薩往生因緣

智 銘

舍利弗白佛言：「菩薩摩訶薩行般若波羅蜜，能如是習相應者，從何處終，來生此間，從此間終，當生何處？」

佛告舍利弗：「是菩薩摩訶薩行般若波羅蜜，能如是習相應者，或從他方佛國來生此間，或從兜率天上來生此間；或從人中來生此間，舍利弗！從他方佛國來者，疾與般若波羅蜜相應，與般若波羅蜜相應故，捨身來生此間。諸深妙法皆現在前，後還與般若波羅蜜相應，在所生處常值諸佛。舍利弗！有一生補處菩薩，兜率天上終，來生是間，是菩薩不失六波羅蜜，隨所生處，一地陀羅尼門、諸三昧門，疾現在前，舍利弗！有菩薩人中命終，還生人中者，除阿毗跋致：是菩薩根鈍，不能疾與般若波羅蜜相應，諸陀羅尼門、三昧門，不能疾現在前。」

佛法中有二諦：一者、世諦；二者、第一義諦。爲世諦故，說有衆生。第一義諦故，說衆生無所有。復有二種：有知名字相；有不知名字相。復有二種：有初習行；有久習行。有著者；有不著者。有知他意；有不知他意者。爲知名字相、初習行、著者、不知他意者，故說無衆生；爲知名字相、久習行、不著、知他意者，故說言有衆生。有衆生卽有菩薩生是間，救度

衆生。

菩薩出生有三：一、從他方佛國來生；二、從兜率天上來；三、從人道中來。從他方佛國來者，從諸佛前來生是間，諸根猛利。所以者何？除無量阿僧祇劫罪故；又遇諸佛隨心教導故、又常聞、誦、正憶念般若波羅蜜故。如是等因緣，則菩薩心利。從兜率天來者，兜率天結使不深不利。所以者何？常有菩薩說法故，是故僅說兜率天來生，不說餘處。從人中來者，此間佛弟子聽般若波羅蜜，集諸功德，捨身還生是間。

人身罪結煩惱處所，唯大菩薩處之，則無染累：如鵝入水，水不令濕。如是菩薩，一切世間法所不能著，所以者何？佛自說因緣，不失六波羅蜜，諸陀羅尼門、諸三昧門，疾現在前。是菩薩來生世間，利益衆生。

佛言：「舍利弗！汝所問菩薩摩訶薩與般若波羅蜜相應，從此間終，當生何處者。舍利弗！此菩薩摩訶薩，從一佛國至一佛國，常值諸佛，終不離佛，舍利弗！有菩薩摩訶薩不以方便入初禪，乃至第四禪，亦行六波羅蜜；是菩薩摩訶薩得禪故，生長壽天，隨彼壽終來生是間，得人身，值諸佛，是菩薩諸根不利。舍

利弗！有菩薩摩訶薩入初禪，乃至第四禪，亦行般若波羅蜜；不以方便故，捨諸禪，生欲界，是菩薩諸根亦鈍。舍利弗！有菩薩摩訶薩入初禪，乃至第四禪。入慈心乃至捨，入虛空處乃至非有想非無想處，修四念處乃至八聖道分，行十力乃至大慈大悲；是菩薩用方便力，不隨禪生，不隨無量心生，不隨四無色受生；在所有佛處於中生，常不離般若波羅蜜行。如是菩薩，賢劫中當得阿耨多羅三藐三菩提。」

般若波羅蜜中，種種因緣譬喻，多說空法。有新發意者，取空相，著是空法，於生死因緣中生疑：若一切法畢竟空，無來無去，無出入相，云何死而有生？現在眼見法，尚不應有，何況死後餘處生？是事不可見而有，如是等種種邪疑顛倒心，爲斷是故，佛種種因緣，廣說有生有死。

今衆生但見其滅，不見更有出者受於後身，致疑無生死受身因緣。然衆生先世所習憂喜怖畏等，如小兒生時，或啼或笑，先世習憂喜故，今無人教，而憂喜續生。子同父母，好醜貧富，聰明闇鈍，各各不同；若無先世因緣者，不應有異！如是等種種因緣，知有後世。有生有死法，亦可見，亦可知。肉眼故不見，天眼者了了能見。若肉眼能見者，何用求天眼？若爾者，天眼、肉眼，愚、聖無異。如人死生雖無來去者，而煩惱不盡故，於身情意相續，更生身情意；身情意造業，應不至後世。然而從是因緣更生，受後世果報。今世五衆因緣故，更生後世五衆行業，相續不異故，而受果報。如是因緣，故知有生有死。

現世不善法，動發過重，生瞋恚、嫉妬、疑悔、內惱故，身則枯悴，顏色不悅。惡不善法，受害如是，何況起身業、口業！若生善法，淨信業因緣。心清淨，得如實智慧，心則歡悅，身得輕軟，顏色和悅。以有苦樂因緣故，有善不善；今定有善不善故，當知必有後世。但衆生肉眼不見，智慧薄故而生邪疑，雖修福事，所作淺薄。聖人說今現在事實可信故，說後世事亦皆可信，可知定有後世。

佛法中諸法畢竟空，而亦不斷滅，生死雖相續，亦不是常，無量阿僧祇劫業因緣，雖過去亦能生果報而不滅，是爲微妙難知

，若諸法都空者，此品中不應說往生。何有智者前後相違？若死生相實有，云何言諸法畢竟空？但爲除諸法中愛著邪見顛倒故，說畢竟空；不爲破後世故說。

佛法不著有，不著無，不著亦不著。爲衆生故，隨緣說法，自無所著，以是故，中論中說：

一切諸法實 一切法虛妄 諸法實亦虛 非實亦非虛  
涅槃際爲真 世間際亦真 涅槃世無別 小異不可得  
是爲畢竟空相。畢竟空，不遮生死業因緣，是故說往生。

行般若波羅蜜者，深入大悲，如慈父見子，爲無所值物故死，父甚愍之，此兒但爲虛誑故死。諸佛亦如是，知諸法畢竟空不可得，而衆生不知，衆生不知故，於空法中染著，著因緣故，墮大地獄。是故深入大悲，以大慈悲因緣故，得無量福德，得無量福德故，生值諸佛，從一佛國至一佛國，是菩薩從此死，彼間生；彼間死，復至彼間生。如是乃至得佛，終不離佛。或有是間死，彼間生，於彼以五神通力故，從一佛國至一佛國，供養諸佛，度脫衆生，是初菩薩。

佛國者，十方如恒河沙等諸三千大千世界，是名一佛土，諸佛神力，雖能普徧自在無礙，衆生度者有局。諸佛現在者，佛現在其佛國土中者。第二菩薩無方便入初禪，乃至行六波羅蜜。無方便者，入初禪時，不念衆生，住時起時，亦不念衆生，但著禪味，不能與初禪和合行般若波羅蜜，是菩薩慈悲心薄，故功德薄少。功德薄少故，爲初禪果報所牽，生長壽夭。不能以初禪福德，與衆生共迴向阿耨多羅三藐三菩提。如是等無量無方便義。長壽夭者，非有想非無想處，壽八萬大劫。以著邪見不能受道者，還生人間值佛者，以本阿耨多羅三藐三菩提故，或於禪中集諸功德。所以者何？彼間著味，善心難生故。天上命終，還生人間。

菩薩慧根能觀諸法，以久受著禪味故鈍，又信等五根，皆助成道法，以受報著味故鈍。菩薩清淨福德、智慧因緣故，十八根

皆利，罪故則鈍。眼等六根，如法華經說，命根不爲老、病、貧窮等所惱，安隱受樂，是爲命根利。樂等五根了了覺知，故言利。受樂時知樂無常等過隨逐，不生貪欲故利。餘受亦如是。信根堅牢深固，難可能信，故言利。餘亦應如是隨相分別。男根淨者，得陰藏相，不著細滑故，知欲爲過，是爲利。三善根利，故名利。菩薩或於三無漏根不證實際故利，與利相違故鈍。

若菩薩命終時，入不善心，捨諸禪定方便。菩薩若入欲界繫善心，若無記心而捨諸禪入慈悲心，憐愍衆生，作是念：我若隨禪定生，不能廣利益衆生。生欲界者有十處：四天下人，六欲天。三惡道，菩薩所不生。第四菩薩入住得菩薩道，修三十七品，能住十八空，乃至大慈大悲，此名方便。上二菩薩，但有禪定，直行六波羅蜜，以是故無方便。第四菩薩方便力故，不隨禪定無量心生。所以者何？行四念處乃至大慈大悲故；命終時憐愍衆生，願生他方現在佛國，續與般若波羅蜜相應。所以者何？愛樂隨順般若波羅蜜故。此等菩薩，佛自說跋陀劫中菩薩。或有非跋陀劫中菩薩，但取其大者。跋陀者譯爲善，有千萬劫過去，空無有佛，是一劫中有千佛興，諸淨居天歡喜，故名爲善劫。淨居天何以知此劫當有千佛？前劫盡已，廓然都空，後有大水，水底湧出有千枚七寶光明蓮華，是千佛之相。淨居諸天，因是知有千佛。以是故，說是菩薩於此劫中，得阿耨多羅三藐三菩提。

佛言：「有菩薩摩訶薩，入初禪乃至第四禪，入慈心乃至捨，入空處乃至非有想非無想處；以方便力不隨禪生，還生欲界刹利大姓、婆羅門大姓、居士大家，成就衆生故。」菩薩有二種：一者、隨業生；二者、得法性身。爲度衆生故，種種變化身生三界，具佛功德，度脫衆生；故二身之中，是業因緣生身菩薩，所以者何？入諸禪方便力故，不隨禪生。法身菩薩變化自在，則不大須方便。

諸菩薩行各各不同，或有菩薩於禪轉心，生他方佛國；菩薩迴心生欲界，亦如是。他方佛國，雜惡不淨者，則名欲界。若清淨者，則無三惡道、三毒，乃至無三毒之名，亦無二乘之名，亦無女人。一切人皆有三十二相，無量光明，常照世間。一念之頃

，作無量身，到無量如恒河沙等世界，度無量阿僧祇衆生。還來本處。如是世界在地上，故不名色界；無欲故，不名欲界；有形色故，不名無色界。諸大菩薩福德清淨業因緣故，別得清淨世界，出於三界。或有以大慈大悲心憐愍衆生故，生此欲界。

欲界心狂不定，爲柔軟攝心故入禪，命終時，爲度衆生起欲界心。其所以生刹利大姓，爲有勢力；生婆羅門家，爲有智慧；生居士家爲大富故，能利益衆生，貧窮中自不能利，何能益人？

佛言：「有菩薩摩訶薩初發意時，得初禪乃至第四禪得四無量心，得四無色定，修四念處乃至十八不共法，是菩薩不生欲界、色界、無色界中，常生有益衆生之處。」此菩薩或生無佛世界，或生有佛世界。世界不淨，有三惡道，貧窮下劣；或生清淨世界。至無佛世界，以十善道、四禪乃至四無色定，利益衆生，令信向三寶，稱說五戒及出家戒，令得禪定、智慧功德。不清淨世界有二種：有現在佛，及佛滅度後。佛滅度後，或時出家，或時在家，以財施、法施種種利益衆生。若佛在世，作種種因緣引導衆生，令至佛所。清淨世界者，衆生未具功德者，令其滿足，是名在所生處利益衆生。

佛言：「有菩薩摩訶薩，初發意時，行六波羅蜜，上菩薩位，得阿毗跋致地。有菩薩摩訶薩，初發心時，便得阿耨多羅三藐三菩提，便轉法輪，與無量阿僧祇衆生作益厚己，入無餘涅槃；是佛涅槃後，餘法若住一劫，若減一劫。有菩薩摩訶薩初發意時，與般若波羅蜜相應，與無數百千億菩薩，從一佛國至一佛國，淨佛世界。」有三種菩薩，利根心堅。未發心前，久未集諸無量福德智慧；是人遇佛，聞是大乘法，發阿耨多羅三藐三菩提心，即時行六波羅蜜，入菩薩位，得阿毗跋致地。所以者何？先集無量福德，利根心堅，從佛聞法故。

有菩薩初發意，初雖心好，後雜諸惡，時時生念，我求佛道，以諸功德迴向阿耨多羅三藐三菩提，是人久久無量阿僧祇劫，或至或不至。先世福業因緣薄，而復鈍根，心不堅固。

有人前世，少有福德利根，發心漸漸行六波羅蜜，若三、若十、若百阿僧祇劫，得阿耨多羅三藐三菩提。

以上三種發心：一者、罪多福少；二者、福多罪少；三者、但行清淨福德。清淨有二種：一者、初發心時，即得菩薩道。二者、小住；供養十方諸佛，通達菩薩道，入菩薩位，即是阿毗跋致地。次後菩薩，大厭世間，世世已來，常好真實，惡於欺誑，是菩薩亦利根堅心，久集無量福德智慧，初發心時，便得阿耨多羅三藐三菩提，即轉法輪，度無量衆生，入無餘涅槃；法住若一劫，若減一劫，留化佛度衆生。

佛有二種神力：一者、現在時；二者、滅後。劫中所度衆生，亦復不少。次後菩薩，亦利根心堅，久集福德，發心即與般若波羅蜜相應，得六神通，與無量衆生，共觀十方清淨世界，而自莊嚴其國。如阿彌陀佛，先世時作法藏比丘，佛將導徧至十方，示清淨國，令選擇淨妙之國，以自莊嚴其國。

佛言：「有菩薩摩訶薩行般若波羅蜜時，住般若波羅蜜，淨薩婆若道，畢竟空，不生癡心故。如是菩薩摩訶薩行般若波羅蜜時，住六波羅蜜，淨薩婆若道，畢竟空故，不來不去故，不施不受故，非戒非犯故，非忍非瞋故，不進不怠故，不定不亂故，不智不愚故，爾時，菩薩摩訶薩，不分別布施不布施，持戒犯戒，忍辱瞋恚，精進懈怠，定心亂心，智慧愚癡，不分別毀害輕慢恭敬。何以故？無生法中，無有受毀者，無有受害者，無有受輕慢恭敬者。菩薩摩訶薩行般若波羅蜜，得如是諸功德，聲聞、辟支佛所無有，得是功德具足，成就衆生，淨佛世界，得一切種智。」

是菩薩初發意，行般若波羅蜜，漸行餘功德，所謂檀波羅蜜等。菩薩住檀波羅蜜，修治薩婆若道，觀一切法畢竟空，不生慳貪心；以是二事故，開薩婆若道。所以者何？畢竟空中，無有慳貪，慳貪根本斷故。具足檀波羅蜜；具足檀波羅蜜故，莊嚴般若波羅蜜。乃至般若波羅蜜畢竟空故，常不生癡心。所以者何？此中佛自說：一切法不來不去，無施無受故，乃至不智不愚故。

菩薩不念有所施與，無所施與；乃至不念有癡有慧，是人如金剛山，四面風起，不能令動。是菩薩爾時，若有罵詈讚歎，

心無有異。何以故？此中佛自說：無生法中無有罵者，無害者，無恭敬者。聲聞、辟支佛有加害者，不能深有慈悲心，若默然，若遠離；菩薩則不然，能深加慈心，愛之如子方便度之，是故勝一切聲聞、辟支佛，而能教化一切衆生，忍辱慈悲方便深故，隨願清淨業因緣故，能淨佛世界。是法具足故，不久當得一種種智。

佛言：「菩薩摩訶薩行般若波羅蜜時，一切衆生中生等心，一切衆生中生等心已，得一切諸法等；得一切諸法等已，立一切衆生於諸法等中。是菩薩摩訶薩，現世爲十方諸佛所念，是菩薩所生處，眼終不見不愛色，乃至意不覺不愛法。如是，菩薩摩訶薩行般若波羅蜜，不減於阿耨多羅三藐三菩提。」

佛說諸菩薩相，所謂大慈悲故，初發度一切衆生心故，學諸佛等心觀衆生故，一切法自性空故。如是等因緣故，於一切衆生中生等心。得是等心已，得一切諸法等。一切法等者，如先說衆生等、法等義。

慈愍四生衆生，一心欲利益，名衆生等，四念處亦不見身，名爲法等。四勤正等諸四法亦如是。復次，念五道中衆生，皆沒無常老、病、死，是名衆生等。行是信等五根，若五神通，一心欲度是衆生，是名法等。衆生中行忍辱、慈悲等福，功德無量，功德無量故心柔軟，心柔軟故疾得禪定。修禪定故心如意調柔，心如意調柔故，破世間男女黑白長短等，入一法相，所謂無相。得是法已，令一切衆生得是法等。

是菩薩得是二等，成就無量福德智慧故，得現世界果報，爲諸佛所念，餘人所念。愛著生念者，皆是虛妄，唯諸佛念，是爲實念，不愛著故。是人諸佛尚念，何況聲聞、辟支佛、菩薩！聲聞、辟支佛斷結者，猶尚愛念，何況凡夫未離欲者！以菩薩福德因緣故，如是等無量今世果報，後世所生處，眼終不見惡色。惡色者，所謂能生苦受，聲、香、味、觸、法，乃至能生憂心者。如六欲天，六情所對淨妙欲，隨意歡喜。衆生種少德福，生天上如是，何況菩薩福德，實智慧無量無邊，及十方諸佛諸餘賢聖所念。菩薩摩訶薩爲安樂一切衆生故，出現於世。

(完)